



Fundasaun Mahein (FM), 26 Feveiru 2021

## Komunikadu Imprensa

### **PNTL: Polisiamentu iha Situasaun Pandemia Covid-19**

Iha Dezembru 2019 Governu Xina fó sai kona-bá virus foun ida ne'ebé daet daudauk iha sira nia rain no konfirma husi Organizasaun Mundial ba Saúde (OMS) no virus ne'e hanaran Covid-19. Hafoin ne'e, OMS fó sai kona-bá kestaun estratéjiku no prioridade sira hodi prevene no kontrola Covid-19. Situasaun ne'e hamosu resposta global ida hodi evita virus ne'e daet maka distansia sosial, auto karantina, *lockdown* no hapara atividade sira iha públiku hodi evita virus ne'e daet ba bebeik.

Responde ba situasaun pandemia ne'e, Governu halo ona resposta lalais ida ho medida ezekusaun sira ne'ebé involve institusaun governmental sira, sociedade sivil sira no apoiu husi ajensia internacional sira. Resposta importante ida maka deklara Estado de-Emerjensia no medida ezekusaun sira desde Timor-Leste rejista kazu pozitivu Covid-19 dahuluk iha loron 21 Marsu 2020.

Hodi asegura implementasaun Estado de-Emerjensia – PNTL iha papel importante liu-liu implementasaun regras no medida sira prevensaun pandemia Covid-19. Portantu pandemia Covid-19 hanesan krize saúde pública ida ne'ebé bele hamosu kalamidade pública. Iha ne'ebé PNTL nia misaun defende legalidade demokratika, garante seguransa sidadaun no bens nian no proteje direitu sidadaun sira nian tuir termu sira ne'ebé estabelese iha Konstitusaun no Lei sira.

FM nia monitorizasaun desde deklara Estado de-Emerjensia dahuluk to'o dala-sanolu – ligadu ho PNTL nia resposta ba situasaun Covid-19. Komandu Jeral PNTL orienta Komandu Munisipiu sira implementa Estado de-Emerjensia tuir Lei – liu-liu ligadu ho papel sira PNTL nian hodi responde ba pandemia Covid-19. Iha ne'ebé PNTL halo sosializasaun ba regra no medida prevensaun Covid-19, vijilansia iha fatin kuarentena no fatin izolamentu, pontu entrada no saída sira, patrullamentu iha area fronteira no tasi-ibun sira, dalan nasional no munisipiu sira, nomos seguransa ba atividade Governu nian ligadu resposta ba situasaun Covid-19.

Aleinde misaun espesifiku sira resposta ba pandemia Covid-19, PNTL mos kontinua mantein misaun no kompetênsia sira ne'ebé atribui ba PNTL tuir Lei Organika PNTL nian. Iha ne'ebé estratéjia no aproximasaun sira kontinua kaer metin ba filozofia PNTL nian, polísia komunitaria, ho doutrina VIP (vizibilidade, involvimentu no profesionalismu) iha asaun sira polisial nian iha âmbito manutensaun, ordem no tranquilidade pública.

Polisiamentu iha situasaun pandemia Covid-19, PNTL hasoru dezafiu konkreta nu'udar agente implementador Lei no Ordem. Portantu PNTL dezempeña funsaun dupla, funsaun

prinsipal polísial nian, nomos tarefa adisional sira iha âmbito prevene propagasaun surtu Covid-19.

Iha lidun seluk kona-bá medida polisial nian durante situasaun pandemia Covid-19, relasionadu uza forsa la tuir prosedementu uzu nian. Hanesan mos Provedoria Direitus Humanus no Justisa (PDHJ) no Rede Defensor Direitus Umanus (RDDU) sita iha sira nia relatóriu durante Estadu de-Emerejsnia kona-bá PNTL nia atuasaun. Iha ne'ebé atuasaun balu identifika kona-bá violasaun direitus umanus husi membru PNTL.

Haree ba realidade atual, número kazu pozitivu Covid-19 continua aumenta (110) no iha ona transmisaun lokal (kazu 7 husi total kazu 110) no possibilidade sei renova tan Estadu de-Emerjensia. FM enkoraja PNTL aprende husi nia hahalok rasik tantu naksalak sira nomos pratika polisiamentu (polisiamentu komunitaria – VIP) ne'ebé fó susesu boot ba PNTL nia servisu durante situasaun pandemia Covid-19 (Estadu de-Emerjensia ba dahuluk to'o sanolu). Iha ne'ebé polisiamentu ida ne'ebé besik ho comunidade no continua promove parseiru mutua entre polísia ho comunidade ne'ebé existe tiha ona no enkorozza involvimentu comunidade nian iha asaun sira polisial nian.

## **Rekomendasaun**

Maske seidak perfectu maibe resposta membru sira PNTL nian durante situasaun pandemia Covid-19 hatudu sinal pozitivu. PNTL nia polisiamentu durante periodu ne'e mos promove daudauk dialogu (polisiamentu komunitaria) duke resposta sira ne'ebé la nesesariu (uza forsa ne'ebé la nesesariu). Nune'e FM rekomenda PNTL continua promove polisiamentu ne'ebé besik ho comunidade (polisiamentu komunitaria ho doutrina VIP) no ajusta tuir realidade foun iha pratika polisiamentu iha situasaun pandemia Covid-19.

Atu hetan informasaun kle'an liu kona-bá asuntu ne'e bele kontaktu:

### **João Almeida**

Acting Director

Email: [almeidamahein@gmail.com](mailto:almeidamahein@gmail.com)

Telemovel: (+670) 7756 1184

Website: [www.fundasaunmahein.org](http://www.fundasaunmahein.org)